

Inzko: Oni koji se vraćaju moraju biti poštovani

Za reintegraciju je potrebno više od krova nad glavom. Oni koji se vrate moraju dobiti poštovanje i podršku, mora postojati suosjećanje i razumijevanje za ono što su prošli, rekao je danas visoki predstavnik Valentin Inzko na Okruglom stolu o održivom povratku održanom u Evropskoj akademiji u Banjoj Luci. Visoki predstavnik je istakao da je „mjera u kojoj su građani u stanju da poštuju svoje najmilije koji su poginuli u ratu pokazatelj koliko su zajednice i pojedinci spremni da prihvate povratnike i pokažu razumijevanje za njihov gubitak“.

Srebrenica je i dalje poseban slučaj zbog težine zločina koji su tamo počinjeni. U vezi s tim, visoki predstavnik osuđuje nedavno poricanje genocida u Srebrenici od strane predsjednika RS, rekavši da to nije dostojno građana RS. U svome obraćanju na Okruglom stolu, visoki predstavnik je spomenuo skladište u Kravici kao još jedan primjer situacije u kojoj se ne poštuje pravo na odavanje počasti mrtvima. Također se upitao koji su razlozi koji su doveli do izgradnje crkve na Budaku, pored samog groblja na kome su ukopane žrtve srebreničkoga genocida.

Konačno, visoki predstavnik je pozvao vlasti Bosne i Hercegovine da udvostruče napore na osiguranju pune implementacije revidirane Strategije za provedbu Aneksa VII. Pravo na povratak je zakonsko pravo u Bosni i Hercegovini, pa ipak stotine hiljada građana Bosne i Hercegovine još je uvijek raseljeno, a hiljade žive u kolektivnom smještaju. „To je neprihvatljivo i mora se ispraviti, 17 godina nakon potpisivanja Mirovnog sporazuma,“ rekao je Inzko.

Nešto ranije istog dana visoki predstavnik se sastao sa predsjednikom Vlade Republike Srpske, Aleksandrom Džombićem,

sa kojim je razgovarao o crkvi na Budaku kao i o aktuelnoj političkoj situaciji u zemlji i izazovima sa kojima će se vlasti RS suočavati u predstojećim mjesecima. Skrenuvši pažnju na posljednju sjednicu Upravnog odbora Vijeća za provedbu mira, visoki predstavnik je rekao da još uvijek ima puno toga da se uradi kako bi bio omogućen daljnji napredak zemlje. "Uvjeren sam da 2012. može biti prelomna godina za cijelu zemlju, ali domaći lideri moraju postići rezultate", rekao je visoki predstavnik.

Tokom boravka u Banjoj Luci, visoki predstavnik Valentin Inzko također se sastao sa episkopom banjalučkim Jefremom, banjalučkim muftijom Edhemom Čamdžićem i biskupom Franjom Komaricom.